

Ungoti uphakamisa eyokuba kuqinisewe ukuvalwa kwezwe

INTATHELI YELANGA

UPHAKAMISA ukuba iNingizimu Afrika ibuyele esigabeni sesibili sokuvalwa kwezwe, usolwazi ezifweni ezibhubhisayo, njengoba kusondela isikhathi samaholide ePhasika.

USolwazi Salim Abdool Karim, uthi ukubuyela esigabeni sesibili kuzosiza ukugwema ukubhehetheka kweCoronavirus.

Lo solwazi ongomunye wozihlalo be-*ministerial advisory committee* (MAC), uthi ukhathazekile ngokuhlangana kwabantu ezinkonzweni zePhasika ezahlukenene.

NgokwabeNews24, iNational Coronavirus Command Council (NNC), ihlangoze ukuthi uma abantu behlangana, kumele babe wu-50, umthetho wewashi uqale ngo-22h00 kuya ku-6

ekuseni.

Iphakamise nokuthi ukudayiswa kotshwala kugcine ngoLwesine njengoba bekwenzeka phambilini. Ibamba lomkhulumeli kaMengameli Cyril Ramaphosa, uMnu Tyrone Seale, lithi iNCC nekhabinethi balokhu besiqaphe ngelokhozi isimo saleli gciwane kanjalo nesomnotho, kanti ilokhu ixhumana nezinhlaka ezifanele ngaphambi kokuthatha izinqumo.

Ngaphansi kwesigaba sokuqala sokuvalwa kwezwe, umthetho wewashi uqala ngo-12 kuya ku-4 ekuseni, kanti kuvumeleke ukuba kuhlangane abantu abawu-100 emcimbinini owenzelwe ngaphakathi esakhiweni, babe wu-250 ngaphandle.

Ebuzwa ukuthi ngokubona kwakhe kumele kwenzekanjani manje uSolwazi Karim, uthe wuhulumeni onganquma

ngalokho, kodwa ngokubona kwakhe bekumele leli lizwe lehliselwe kwesinye isigaba, kube khona izinto ezivalwayo, ikakhulukazi ngesikhathi samaholide ePhasika.

“Kangazi noma leli gciwane lizohlasela okwesithathu yini, kodwa engikwaziyo wukuthi kangifisi ukukubona lokho. Ngingancamela ukuthi kwenziwe izinto ezizokugwema lokho kunokuthi kuze kufike lapho,” kusho yena.

• Khona manjalo, iMedical Research Council (MRC), ixwayise ngokuthi kungenzeka luhlasele ngamandla ihlandla lesithathu lokhuvethe.

Lokhu ibikutshela ikomiti lasephalamende lapho ithe kubonakala sengathi ukuhlaselela kwehlandla lesithathu sekuseduze kakhulu.

USolwazi Glenda Gray ongumengameli weMRC, uthe umsebenzi osabamele wukuthi

basabalalise imigomo ezinyanengi ezimbalwa.

Uthe leli lizwe lithola imigomo elinganiselwa ku-80 000 njalo ngemuva kwezi-nsuku eziwu-14, ivela enkampanini yabakwaJohnson & Johnson.